

Date – 27/11/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Mizoram Chief Secretary thar Pu Khilli Ram Meena chuan vawiin khan a hnarawn zawm turin Aizawl a lo thleng.**
- 2. Mizoram chhung tan in hrang hrang a lung in a tang thei bithliah zat aia tam tang 514 an awm mek.**
- 3. Sawrkar laipui chuan vawiin khan rampum huap naupang inneih tibo tura beihpui Bal Vivah Mukh Bharat a tan.**
- 4. Tukin dar 7:30 atang khan Israel leh Hezbollah te chuan inkahhai an puang.**

<><><>

NEW CS

Mizoram Chief Secretary thar Pu Khilli Ram Meena chuan vawiin khan a hnarawn zawm turin Aizawl a lo thleng.

Pu Khilli Ram Meena hi AGMUT Cadre IAS officer, kum 1993 batch a ni a. Chief Secretary charge lo la mek tu Pu H Lalengmawia hnen atangin charge a la dawn a. Vawiin tlai lam hian Pu Khilli Ram Meena chuan Chief Minister Pu Lalduhoma chu a hmu nghal dawn bawka ni.

Ministry of Home Affairs in Mizoram Chief Secretary atan a ruat hma hian Pu Khilli Ram Meena hi Additional Secretary, Ministry of Minority Affairs hna chelh lai a ni.

<><><>

NH HIGHWAY

National Highway 306 leh 06 thawmthat hnathawh kal mek leh chak zawka a hna a kal theih dan tur chungchang vawiin khan Mizoram Legislative Assembly Deputy Speaker leh Kolasib Bialtu MLA ni bawka Pu Lalfamkima hovin sawiho a ni a.

Thutkhawm hi Kolasib DC Pu Robert C Lalhmangaihan a kaihrui a, Deputy Speaker Pu Lalfamkima chuan thu sawiin, kawng tha neih a nih theih nan kawng hrang hrang a hma lak a lo ni tawh thin a. Amaherawhchu chhan hrang hrang leh chhuanlam eng eng emaw avangin Company leh Contractor ten duhthusam in hna an thawka thin lova, churang chuan motor tamtak tan tlan a him lova, Traffic nasa tak in a jam phah thin bawka, chak lakluhna pawhin a tuar tazet a ni, a ti.

Deputy Speaker chuan kawng chhia in a nghawng ber chu mipuite an nih avangin kawng siamtute pawhin mipuite tan hna an thawka tih an in hriat angai takzet a ni, a ti a. Mizoram lung tam zawka chu lung chang tha a nih loh avangin

hun reilote bak a daih lova, chuvang chuan state pawn lam atanga lung chang tha leh material pawimawh dang te chaw lut thin turin NHIDCL, Balaji Construction leh Sadguru Contractors te chu a hrilh bawk a ni. Tun working season reilote hi hmang tangkaia Contractor te pawhin rinawm taka an hnate an thawh angai a ni, a ti a. He kawngtha neih theih nan hian sawrkar mai ni lovin NGO leh Pawl hrang hrangte chu an pawimawh vek avangin theihtawp an chhuah ho angai a ni, a ti bawk.

NHIDCL hian Vairengte -Bilkhawthlir leh Kolasib - Kawnpui inkar kawng chu nakum March 2025 bawr chho a Black Topping zawh hman an in beisei thu an sawi. Pawl aiawh a lokal te pawh in hna chak zawka kalpui a nih theih na turin Sawrkar leh Contractors te chu theihtawp chhuah turin an ngen a, a tul ang anga thawhpui an in huam thu an sawi bawk a ni.

Vawiina thutkhawmna ah hian Deputy Speaker leh Kolasib DC bakah Kolasib SP Pu David H Lalthangliana, PWD SDO (HIGHWAY), Forest ACF, DTO, NHIDCL aiawhte, Balaji leh Sadguru aiawhte, Kolasib District Truck Owners Association, JAC Kolasib, YMA Sub Hqrs aiawhte leh sawmbik mi pawimawh te an tel a ni.

<><><>

PRISONERS DATA

Mizoram chhung tan in hrang hrang a lung in a tang thei bithliah zat aia tam tang 514 an awm mek.

Prisons Department in Akashvani correspondent zawhna a chhan danin, tun dinhmuna state chhunga lung in tang zawng zawng zat chu 1715 an ni a, mi tangte hi Aizawl Central Jail-ah tam berin 812 an tang mek a, Champhai District Jail-in dawt lehin mi tang 161 an awm mek a ni, Mizoram chhunga lung in mi tang tlem berna chu Lawngtlai District Jail niin mi tang 35 an awm mek a, Naupang kum tling lo, an nu leh pa te lung in tan avanga tan in a enkawl Aizawl Central Women Jail ah 4 leh Champhai District Jail-ah 1, a vai a belkhawmin 5 an awm mek bawk.

Lung in a tang tura bithliah zat ai a tam an tanna hmun kan correspondent hnen atangin I lo ngaithla ang.

Voice Cast : Mizoram lung in hrang hrang a tang tur zat ai a tam an tanna-ah Aizawl Central Jail a mi tang awm te chu an tam ber a, tang tur zat bithliah ai a tam 374 an awm a, hei hi Champhai District Jail chuan dawt lehin mi tang zat ai a tam 56 an awm mek a, mi tang awm tura tih ai a tam hi Aizawl Central Women Jail-ah 46 awmin Aziawl District Jail-ah 25 leh Lawngtlai District Jail-ah 13, an vaiin 514 an awm mek a ni. Mizoram chhung lung in zawng zawng a mi tang awm thei tura bithliah hi mipa 1130 leh hmeichhia 256, a vai a belkhawmin 1386 a ni .

<><><>

TOMATO FESTIVAL

KVK Khawzawl buatsaihin Neihdawn khuaa Lungding tlangah Krishi Vigyan Kendra (KVK) kum 50-na (Krishi Swarna Samridhi) lawmnan Tomato Festival hman a ni a, Khawzawl DC Pu K. Vanlalthiana chuan a hmanpui a ni.

KVK Senior Scientist & Head Dr. Malsawmkimi chuan he hun hi a kaihruai a, Pu K. Vanlalthiana chuan kalkhawmte hnenah thusawiin Neihdawn

khaw mipuite taimakna fakawm a tihthu a sawi a, tomato chin kawngah ngaihtuahna tha tak seng a eizawmna tling tak an siam thei chu ropui a tih thu sawiin, taima taka thawk zela district ti hmingmawitu ni zel turin a fuih a, hun lo kal zel turah theihtawp chhuaha tanpui zel a tum thu a sawi.

KVK kum 50-na lawmna pual hian Tomato thar tha inelna buatsaih niin, Pu K. Vanlalthiana'n inelna a tithate hnenah lawmman a sawm a ni.

Neihdawn khuaah hian chhungkaw 150 atangin chhungkaw 92 in Tomato an ching a, Tomato hi kumkhatah vawihnih thar theih niin, Kum 2024 chhung hian a thawhkhat nan 460 quintal thar chhuakin cheng nuai 36 an lei chhuak tawh a, a thawhnhina ah hian quintal 2000-3000 thar chhuah inbeiseiin Rs. 40/kg anga chhutin cheng nuai 80 man lei chhuak turah beisei a ni.

He hunah hian Neihdawn khaw mipui thahnem tak an tel a, Sawrkar Department hrang hrang aiawh ten an tel pui bawk a ni.

<><><>

SBI STUDENTS LOAN

Zirna sang zawk zir tura sum puk ngai zilaite tan State Bank of India chuan Education Loan cheng nuai 482 chuang a pechhuak tawh.

Akashvani Correspondent an hrilh danin State Bank of India Mizoram hotute chuan kum thum liamta atang khan Mizo zirlai lehkha zirna atan a loan mamawh-te hnenah loan an pek thin hi chhinchhiah theih chinah zirlai 62 an ni a, an vaia sum an puk zat hi cheng nuai 482 chuang a ni tawh a, hemi chungchanga report kan correspondent hnen atangin ngaithla ang.

Voice Cast : State Bank of India chuan India ram pum a zirlai an lehkha zir zelna atana sum mamawhte tan students loan an pek chhuah thin angin Mizoram-ah pawh Mizo zirlai loan mamawhte hnenah Education loan hi an pechhuak tawh a, kumin chhung pawhin zirlai 11 ten loan hi la in an loan lak hi a vai a belkhawmin nuai 163 sing 9 sang 1 leh za riat a tling a ni.

<><><>

LUNGLEI DC

Lunglei District Deputy Commissioner thar Pi Navneet Mann chuan vawiin chhun khan DC Conference Hall-ah MJA Lunglei District member-te nena inhmehriat nana inkawmin Hriselna, zirna leh kut hnathawh lam tihhmasawn chu a ngaih pawimawh hmasak a nih tur thu sawiin, bawlhhlawh sawngbawlina chungchang leh faina lamah te pawh theih tawp chhuah a tum thu a sawi. MJA member-te chu amah bengvar a, finchhuah a, thurawn pe thin tura sawmin, an ngaihawh zawngte pawh a hnena thlen hreh lo turin a chah.

Lunglei DC Pi Navneet Mann chuan Punjab atanga lo kal a nih thu leh AGMUT Cadre IAS a in ziak tling niin tuntum hi a posting hmasaber a nih thu a sawi a, Lunglei District hmasawn nan te, mipui vantlang tan leh kut hna thawktute hmakhua ngaia theih tawp chhuah a tum thu sawiin chanchinbu mite leh mipuite thawhpui leh tawiawmna a ngen a ni.

Hetihlai hian, Lunglei YMA Sub.Hqtrs vawiina thukhawm chuan thuchhuah siamin Lunglei Dist.awp tur a hnam dang vek dah a ni chu thalo an tih thu an chhuah a. DC kalta kha sawn anih dawnin sawn lo turin Mizoram sorkar an lo ngen tawh thu leh a hlawhchham ta a ni tih sawiin DIG(S-R) nakum lawka pension tur chu sawn a ni a, a aiah hnamdang dah a ni. SP ah hnamdang bawk dah leh a ni. Lunglei Dist hi a zau in hnam hrang hrang awm khawmna a ni a, chuvangin tawng thiam lo leh dist.dinhmun hrethiam lo vek tan chuan Law & Order ah harsatna a awm thei a ni an ti a. Hei vang hian SP

sawna order hi naktuk tlai dar 4:00 hma a sut turin sorkar an ngen a, an ngenna in awmzia a neih loh chuam zau zawk a hmalak dan tur ngaihtuah a ni ang tiin thuchhuah an siam.

Lunglei DC,SP leh DIG(S-R) tranfer and posting chungchangah MZP leh Congress party pawhin thalo an tih thu an chhuah a ni.

<><><>

AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

<><><>

BAL VIVAH MukT BHARAT

Sawrkar laipui chuan vawiin khan rampum huap naupang inneih tibo tura beihpui Bal Vivah MukT Bharat a tan. He beihpui thlak hian a tum ber chu naupang kumtlinglo inneihna awmlohna ram siam a ni a. Campaign hawngtu Union Women and Child Development Minister Annpurna Devi chuan sawrkarin ramchhung district 130 chu campaign ngawrh bikna tur a thlang tawh a ti a. Naupang inneih tir chu dan kalh mai ni loin mihring mihrinnaah pawh pawikhawihna a ni a ti a. Bal Vivah MukT Bharat Campaign chu ni 10 emaw 15 chhung chauh kalpui tur ni loin India rama naupang inneihna a reh vek hma chu theihtawp chhuah tur a ni a ti.

<><><>

PARLIAMENT

Vawiina Parliament in hnih rorel inkhawm chu opposition memberte thil chi hrang hrang sawiho an phut avangin rorel thei loin tihtawp a ni. Opposition te hian sumdawng group pakhat hlemhletna chungchangte, Manipur buaina leh UP-a Sambhal-a tharum thawhna thleng sawiho an ngiat avangin house chhungah rorel theih a ni loa. Chhun dar 12 khan vawiin atan rorel inkhawm hi tihtawp a ni.

Rajya Sabha-ah chuan Chairman Jagdeep Dhankar chuan oppostion MP ten sumdawng pawl pakhatna hlemhletna avangte, Manipur buaina leh UP Sambhal thilthleng chungchangah rule 267 behchhana adjourment notice hman an dil chu a hnawl sak a. Rajya Sabha-ah kalphung awmsa anga chairman thutlukna anga kaltlang tur niin a sawi a ni.

Lok Sabha-ah pawh heng thu ngai bawk hi sawiho phutin opposition ten bengchheng an siam a ni

<><><>

ISRAEL-HEZBOLLAH CEASEFIRE

Tukin dar 7:30 atang khan Israel leh Hezbollah te chuan inkahhai an puang. Thla engemawzat an inkah hnuah leh nunna tam tak chan anih hnuah inkahhai hi remtih a ni a. US hmalaknaa he inkahhai inremna hi ruahman niin thla 14 chhung indona chu a tawp rih dawn ta a ni. Inkahhai puan anih hnu hian Lebanese tam

**tak an chenna in chhuahsan tawhte chuan an khaw lam panin an let
leh tan nia thudawn a ni.**

<><><>